


Գլուխ Ե.

ՎԱՆՔԻ ՀԻՄՆԱՐԿՈՒԹՅԱՆ ԺԱՄԱՆԱԿԸ



եր հին մատենագիրները Սանահնի վանքի հիմնադրման մասին տալիս են բավական շատ, բայց միմյանց հակասող տեղեկություններ:

Այդ տեղեկությունները կարող ենք բաժանել երեք խմբի.

ա. Վանքի հիմնարկությունից առաջ նրա տեղում կանգնեցրած խաչի և կառուցած մատուռի կամ եկեղեցու մասին:

բ. Աստվածածին եկեղեցու շինության մասին Բագրատունյաց Աբաս թագավորի ժամանակ (929—953):

գ. Աշոտ Ողորմածի ժամանակ (953—977) վանքի հիմնարկության և միաբանությունը կազմակերպելու մասին:

Վանքի տեղում քրիստոնեության մուտքի ժամանակ խաչ կանգնեցնելու կամ եկեղեցի շինելու մասին մեր ունեցած տեղեկությունները հիմնված են միայն ավանդությունների վրա, և հին մատենագրության մեջ ոչ մի ակնարկ չկա:

Այդ մասին առաջին անգամ տեղեկություն է տալիս 19-րդ դարի սկզբի հեղինակ Հովհաննես Արիմեցին: Նա գրում է, որ Սանահնի եկեղեցիներից մեկն ըստ ավանդու-

թյան հիմնարկված է 4-րդ դարի սկզբին և ենթադրում է, որ Զաքարյան տոհմի տապանատան արևելյան կողմում գտնվող ավերակներն այդ հնադույն եկեղեցուն են պատկանում¹:

Այդ ավերակներն այժմ էլ կան տեղում և պատկանում են արտաքուստ ուղղանկյուն բառանկյունի և ներքուստ խաչաձև զմբեթավոր մի եկեղեցու, որի շորս անկյունների վրա եղել են շորս նեղ և երկարավուն ավանդատներ՝ արևելակողմի կիսաբոլոր արսիդով: Այժմ այդ տաճարից գետնի երեսին մնացել են միայն հարավային կողմի երկու ավանդատները և հարավային ու արևելյան արսիդների որոշ մասերի մնացորդները առանց հրեսապատ քարերի, որոնք այդ վիճակում էլ, առանց պեղումների, լիակատար հնարավորություն են տալիս գաղափար կազմելու տաճարի ընդհանուր ձևի մասին:

Պարզ է, որ այս տաճարն իր նեղ ու երկարավուն ավանդատներով շատ հին չի կարող լինել: Նա իր հատկանշական մնացորդներով կարող է պատկանել միայն 11—13-րդ դարերին, իսկ 4—5-րդ դարերում կառուցում էին հարավից-հյուսիս ձգված ավանդատներ միայն:

Նշանակում է, Զաքարյանների տոհմա-

¹ Описание монастырей Ахпатского и Санагинского архимандрита Иоанна Крымского, СПб, 1863, стр. 47.